



TYSNES KOMMUNE
Uggdalsvegen 301
5685 UGGDAL

Dato: 01.12.2017
Vår ref.: 2014/11042-174
Saksbehandlar: evataul
Dykkar ref.:

Regional kystsoneplan for Sunnhordland og Ytre Hardanger - svar på brev av 24.08.17 og 15.11.2017

Viser til dykkar brev av 15.11.2017 der de ber om svar på skriv av 28.august 2017. Vi viser også til vårt brev av 21.11.2017 om avklaring av vesentlege innvendingar til planen.

De ber om tilbakemelding på avgrensing av regionalt viktige område for landskap, natur, friluftsliv og kulturminne i planen og særleg avgrensing i Tysnes og Kvinnherad kommunar i høve til endringar som er gjort for område 1. Marsteinen – Skorpo i Austevoll kommune.

Vi viser her til saksframlegget frå fylkesrådmannen for vedtak av kystsoneplanen datert 30.08.2017 der Regionalt viktige område for landskap, natur, friluftsliv og kulturminne vert omtalt i pkt 5.7:

«I etterkant av høyringa har Tysnes kommune ved rådmannen samordna med administrasjonen i Kvinnherad i brev av 24.08.17 bedt om ny avgrensing for område 7. Godøya i Tysnes, område 9. Halsnøy i Kvinnherad og område 11. Rosendal – Dimmelsvik. Dei meiner seg forskjellsbehandla i høve til Austevoll kommune der det er foreslått ny avgrensing. Dei ønskjer primært at arealsonene berre skal strekke seg over sjøareal, sekundært at det vert gjort ny avgrensing opp mot gjeldande kommuneplanar. Dette konkrete innspelet er ikkje kome i høyringa og etter at styringsgruppa har avslutta sitt arbeid. Retningslinje 1.4 til planen seier at tidlegare godkjente og gjeldande kommuneplanar og reguleringsplanar innafor planområdet gjeld uavhengig av denne planen. Frå Austevoll har det kome merknader om avgrensing av arealsoner for landskap i begge høyringane, både frå kommunen, næringsaktørar og organisasjonar. Dette har også vore tema for diskusjon med kommunen i prosessen. Endring av område 1. Marsteinen – Skorpo i Austevoll er resultatet av prosessen som heilheit og ikkje på bakgrunn av einskildinnspel.»

I dykkar brev blir det også bedt om vurdering av rekkevidda til retningsline 3.1.2, om denne er avgrensa til akvakultur eller om den også gjeld andre tiltak.

Retningslinje 3.1.2 er underpunkt av §3.1 Arealsoner Landskapsområde. I pkt 3.1.1 går det fram at regionalt viktige område for landskap, natur, friluftsliv og kulturminne er vist som arealsoner landskapsområde. Pkt 3.1.2 seier at: *Nye tiltak innafor arealsonene skal tilpassast og ivareta dei konkrete verdiane. Nye areal for akvakultur og større, varige tekniske inngrep skal i hovudsak ikkje tillast. Eksisterande næringsområde innafor arealsona kan nyttast vidare.*

Retningslinje 3.1.2 gjeld for regionalt viktige område for landskap, natur, friluftsliv og kulturminne. Desse strekk seg over både sjø og landområde. Vi viser her til omtalen i plandokumentet kap. 3.7 side 22:

«I planarbeidet er dei fire plantema landskap, natur, friluftsliv og kulturminne, sett i samanheng for å kartfeste større samanhengande område av regional verdi. Område som omfattar registreringar av nasjonal eller regional verdi innan alle fire plantema er definert som arealsone landskap. Intensjonen med å kartfeste desse sonene er å synleggjere sumverknad av landskap, natur, friluftsliv og kulturminne, og gi retningsliner knytt til desse for å ivareta verdiane. Temalaga er knytt til både sjøområda og strandsona, og desse er sett i samanheng for å finne koplingar og knutepunkt mellom sjø og strandsona. Kommunestruktur eller eigarstruktur er ikkje vurdert i samband med arbeidet med å lokalisera områda, dei er utelukkande avgrensa på grunnlag av kartfesting av dei eksisterande verdiane.»

Kartfestinga inneber ikkje i seg sjølv eit vern, men at desse områda skal takast vare på gjennom omsyn i lokal planlegging og forvaltning. Det er ikkje eit mål å legge lokk på lokal utvikling, men at det i områda må vera ei tilpassa utvikling tufta på berekraftprinsippet, og med omsyn til dei registrerte verdiane. Avgjerande moment er omsyn før bruk, tilpassa bruk og utvikling, samt skjøtsel gjennom bruk. I konkrete saker må kommunane gjera ei vurdering av om tiltaka sin karakter og omfang vil redusere verdiane, og ut frå dette gjera vedtak i saka.

Innanfor arealsone landskap skal nye tiltak tilpassast og ivareta omsyna. Større tekniske inngrep skal som hovudregel ikkje tillatast i urørte område. Det skal som hovudregel ikkje leggjast ut nye område for akvakultur innanfor desse område. Det er samstundes presisert i retningsline 3.1.2 at eksisterande næringsområde innanfor arealsona kan nyttast vidare. Det er i desse områda eit særskilt fokus på estetikk og tilpassing for eksisterande anlegg og tiltak.»

Vi syner elles til tilsendte plandokument og vedtaksbrev i saka.

Bård Sandal
fylkesdirektør regional utvikling

Eva Katrine Ritland Taule
fagleiar kommunal plan

Brevet er godkjent elektronisk og har derfor inga underskrift.